

БУДЫН ГОМДОЛ

Сагаахан шарайтай, шарахан толгойтой Буда хүбүүн үглөөгүүр эртэ нэрээд, дулаахан бэээрээ жэгнэн хэбтэһэн эхээ хүзүүдэжэ эрхэлнэ.

– Эжы, хэзээ томо болохо хүнбиб?! Яагаа удаан ургана гээшэбиб?

– Томо болохош даа, хүбүүмни, алтамни. Саг ехээр бү яаруула. Ургажа үрдихэш.

Буда хүбүүхэн гэнтэ эхынгээ һаншагта элихэнээр сайбалзаһан сагаан үһэ обёоржорхибо.

– Эжы, эжыхэмни, энэ һаншагтатнай сагаан үһэн байнал,– гээд, гомдолтойхоноор хэлэбэ. Хүбүүнэйнгээ гомдол ойлгоогүй эхэнь:

– Яагаабши, хүбүүхэймни! Хөөрхэймни! – гэжэ мүнсэгэр шарахан толгойень өөгшөөн эльбэнэ, үндэнэ.

– Абгай бидэ хоёрой томо боложо үрдеэгүйдэмнай та хүгшэрхэтнай. Бидэ томо боложо үрдихэгүймнай,– гэжэ хүбүүн эрхэлэн һугшарна.

Сагаахан шарайтай, шарахан толгойтой Буда хүбүүнэй томо болотор ямар саг болохо юм ааб?